

## LXIV.

Грамота кiev. митрополита П. Могилы къ южно-русскому духовенству о томъ, чтобы тѣло умершаго войскаго луцкаго пана Вилгорскаго, какъ католика и при томъ находящагося подъ запрещеніемъ католическаго духовенства, не было предаваемо погребенію православнымъ духовенствомъ по христіанскому обряду.

1643 г. февр. 18.

*Року тисеча шестсотъ чотырдесять третего месеца июня шестнадесятото дня.*

На вряде кгородскомъ, в замъку его кор. милости Луцкомъ, передо мною Андреемъ Гуляницкимъ, наместникомъ подстароства Луцкаго и книгами нинешними кгородскими Луцкими, становъши очевисто урожонный пан Самоел Слотъвинский для вписаня до книгъ нинешнихъ кгородскихъ Луцкихъ подал перъ облятамъ листъ отъ его милости отца метрополита Киевскаго, Галицкаго и всея России, в благочестии будучаго, с печатью и с подписомъ руки его и с подписами рукъ священническихъ, в справе княжати его милости пана воеводы Волинскаго до духовенства писанный, о чомъ тотъ листъ ширей в себе маеть, просечи, абы принять и до книгъ уписанъ былъ, котораго я врядъ принявъши читаломъ,—и такъ се в себе писанный маеть: Петръ Могила, милостіею Божию архиепископъ метрополитъ Киевский, Галицкий и всея России, ексарха светого апостольскаго фрону Константинопольскаго, архимандритъ Печерский.—Пречеснымъ господиномъ отцемъ презвитеромъ во всехъ диоцезіяхъ епископий православныхъ, а особливе Луцкой, будучымъ, церкви восточное и нашего смиренія в Святомъ Дуси сыномъ, благословеніе наше. Далъ намъ ведомостъ ясне освещонный княжа его милостъ Санъкгушко, панъ воевода Волинский, ижъ в певной справе своей од небожчика пана Александра Вилгорскаго, войскаго Луцкаго, за живота небожчиковскаго не могъ мети успокоеня, теды по смерти небожчиковской справилъ то его милостъ у суду духовнаго набоженства рымскаго, абы тило небожчика пана войскаго Луцкаго на мѣстцу костелномъ од жаднаго духовнаго набоженства рымскаго звычайемъ христіанскимъ не было ховано, ажъ поки его милостъ панъ воевода Волинский в своей справе не будетъ укоченый, аже тило небожчика пана Вилгорскаго в церкви Ороховской ди-



опезиен Луцъкой послушенства нашего, кром ведомости его милости отца Афанасия Пузыны, епископа Луцъкого и Острозкого, ест зложоно, теда за инстанцією кнежати его милости пана воеводы Волинского, прихилиючи до запрещення в той справе его милости отца епископа Луцъкого, на тот час властию нашею метрополитанскою и ексаршескою честностям вашим приказуемъ, абысте тела того его милости небожчика пана Вилгорского при церквахъ своих ховати звычайемъ хрестиянскимъ, под извержениемъ от священства, неважилися, поневажъ небожчикъ не былъ нашего набоженства и перед смертю своею сповед и сакрамента перед духовным набоженства римского отпавоваль, ведлугъ чого належить, абы и тело небожчиковъское было ховано. Писан в Городку, месеца февраля осмънадцатого дня, року тисеча шестсотъ чотырдесятъ третего. У того листу печать метрополитанская притисненая, а подпись рукъ тыми словы: *рукою власною*. Roku tysiąc szescseth czterdziestego trzeciego, miesiąca marca dnia trzynastego. Iż mi iest oddana kopia tego listu do zamku. Grzegorz Bieniecky namiesnik ręką. Я иеромонахъ Матфей Рогатинский, наместникъ монастыра Братскаго Луцъкого, ознаймую, ижъ ми дано копею того листу, рукою власною. Иванъ свесченикъ Покровский ознаймую, ижъ дано копию того листу. Я Марко свесченикъ светое Пречистое ознаймую, ижъ дано копию того листу в Луцку. Я Иван Вирозубовичъ протопопа Берестецкий ознаймую, ижъ ми дано копию того листу одъде тут в Берестечку. Лука Блучский свесченикъ Стрелецъкий ознаймую, ижъ ми дано копию. Илия Селецъкий протопопа Горуховъский ознаймую, ижъ еси мель сей лист в рукахъ своихъ и подписую рукою власною. Прокопий свесченикъ Марковъский святаго Михайла, рукою власною. Семион Праведъницкий Старогороховъский, рукою власною. Я Феофанъ Скуминович игумен монастыра Гостского ознаймую, ижъ мене дошла копия из сего листу, рукою власною, року тисеча шестсотъ чотырдесятъ третего, месеца марта дня третего, водлуг свята римского у Стобыхъве. Я Иван свесченикъ церкви Пресвятое Богородицы, дошла мя копия з листу отца метрополиты през отца Геврасия инока Милецкого у Гуловци. Я Тимофей свесченикъ светое Тройцы, дошла мя копия през отца Геврасия инока Милецкого в Подорску. Я Яковъ свесченикъ церкви светого Покрова, дошла мя копия презъ отца Геврасия инока Милецкого в Черновъци. Я Яролий свесченикъ церкви светое Пречистое, дошла мя

копия през отца Геврасия инока Милецкого в Мелницы. Я Тимофей свещенникъ церкви светого Николы, дошгла мя копия през отца Геврасия инока Мелецького въ Кашовце. Я Василей свещенъникъ церкви светое Парасковен, дошла мя копия през отца Геврасия инока Милецького в Подрижу. Я Михайло свещенникъ светого Михайла, дошла мя копия през отца Геврасия инока Милецкого въ Соколю. Я Феодоръ свещенникъ святое Троицы, дошла мя копия през отца Геврасия инока монастыра Милецького у томъже месте. Я Феодоръ свещенъникъ церкви Успения Пресвятое Богородицы, дошла мя копия през отца Геврасия инока Милецького у Розчичах. Я Захария свещенъникъ светого Михайла, дошла мя копия през отца Геврасия инока Милецького в Черчичахъ. Я Иван свещенъникъ светого Спаса, дошла мя копия през отца Геврасия инока Милецкого в Микоши. Отдана ест копия през отца Геврасия инока Милецького и Черчичахъ, копия дошла мене в Торговицы у светое Пречистое и в светого Вознесения. С того листу дошла нас копия: Я Иванъ свещенъникъ Пречиский, власною, в Муравицы. Я Тимофей свещеникъ святого Успения, дошла мене копия. Павелъ Жастковичъ презвитер Стояновъский заложенья храму светое великое мученицы Парасковен, наместникъ епископа православъного, рукою власною. Я Иванъ Дидковичъ свещеникъ Радомыский ознаймую, ижъ мя дошло копие того листу. Я игумень Митрофанъ монастыра Стояновского ознаймую, ижъ ме з листу отца метрополиты копия дошла. Я Иванъ свещенъникъ Дмитрис Семеновъский ознаймую, ижъ ме з листу сего копия естъ одъдана. Я инокъ Леонътий манастира Перевалинъского ознаймую, ижъ мя копия дошгла сего листу. Манастира Загоровъского я игумень Феофианъ, с того листу копия мини дана, рукою власною.—Который же то лист за поданем и прозбою вышъречоное особы, а за принятемъ мнѣмъ урядовымъ, увесь с початъку ажъ до конца до книгъ естъ уписанъ.

*(Изъ гродской мушкоу книги, хранящейся въ Киевскомъ Централ. Архивъ, подъ № 2160; л. 133 об. и слѣд.)*